



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Xanctonen. Et Mag. P. Petragoricen. Archidiac.

**urn:nbn:de:hbz:466:1-20006**

rint instituti, redditus ex ea in absentia non percipiant, sed tunc solum cum in ea fuerint residentes; cum secundum Trecent. Ecclesie consuetudines omnes in hoc consueverint esse pares. Statuerunt etiam ut cum singulis prebendis annexa sint vinea, ipsis suas, dum vixerint, possidentibus, vinea decedentium ad successores non transeant, sed proventus earum inter singulos dividantur. Cum igitur quod quisque juris in alterum statuit, ipse debeat uti eodem, & sapientis dicat auctoritas, *Patere legem quam tuleris*, fraternitati vestrae per apostolica scripta mandamus quatenus antiquos Canonicos junioribus & juniores in perceptione fructuum tam prebendarum quam vinearum coequetis antiquis, secundum priorem consuetudinem usque ad tempus predictae institutionis servatam, vel secundum rationabilem institutionem deinceps observandam, illos per distractionem eccle. percipientes, si qui duxerint re-nitendum. Nullis literis &c. harum tenore &c. Quod si ambo &c. alter vestrum &c. Datum &c.

## TRECEN. EPISCOPO.

Epist. 193.  
Initia concordie confirmatio apostolica.

**I** vestis petentium &c. usque ad verbum assensu. Compositionem super abbacia Belliloci quoad vixeris ordinanda, inter te ex una parte & dilectos filios Alesum Abbatem Calmontensem, Robertum & Gervasium Canonicos Præmonstraten. nomine Abbatis & totius Conventus Præmonstraten. apud Ecclesiam Romanam agentes ex altera, per dilectum filium S. r. sanctæ Prædixis Presbyterum Cardinalem de mandato apostolico celebratam, sicut sine pravitate qualibet facta est, & ab utraque parte recepta, & in ejusdem Cardinalis authentico plenius continetur, auctoritate apostolica confirmamus. Nulli ergo &c. Datum Romæ apud sanctum Petrum.

## XANCTONEN. EPISCOPO.

Epist. 194.  
Vt Prior de Prato dilapidator deponatur.

**I**nter ea per quæ status Ecclesie vacillat, sepius est causa potior incuria, seu perniciose negligentia Prælatorum. Nam cum forte caput est languidum, est necesse quod membra langueant: & infecta morbi contagia nec fomentum medendis capiunt, nec prius possunt de facili restitui sanitati.

Sanè dilecti filij pauperes Canonici de Prato apostolatu nostro significare curarunt, quod cum Petrus nunc Prior ipsorum olim in Grandimoten. Ecclesia sub religionis habitu per annos plurimos permanisset, arctam tandem devitans regulam, ad ollas carniū redire voluit, & oblitus voti quod fecerat, ad Canonicos se transtulit regulares, & in ipsa Ecclesia de Prato voluit eligi in Priorem. Cumque domus sibi dominium commissum jam esset à fratribus, debacchatur in gregem subditum, nec illorum bona distrahere pertimescit, sed solus fugiens fratrum mensam atque collegium, ab illorum quidem confortio se reddit sepius alienum. Unde quisque passim ad libitum impune potest excedere, & sic perit honestas ordinis, per quam locus olim floruerat, & vilescit quod carum omnibus religionis hospitalitatisque gratia præpollebat. Adjecerunt insuper quod cum domus bona deficerent, plures ibidem canonicare præsumpsit. Laicos etiam contra approbatam Ecclesie consuetudinem multos intrudere non expavit, sed quod ab eis fuerat elargitum non transfundit in usus fratrum egentium, sed malè acquisita juxta motum propriae voluntatis expendit. Nolentes igitur ut arbor sterilis occupatam diutius terram detineat, fraternitati tuae per apostolica scripta mandamus quatenus de veritate predictorum inquirere non postponas, & si removeris ita esse, ipsum ab administratione Prioratus amoveas, & predictis Canonicis eligendi personam idoneam auctoritate nostra liberam tribuas facultatem; dictumque Priorem, ut ad claustrum predictum redeat, per censuram ecclesiasticam appellatione cessante compellas, & cum antiqua sit ipsius Ecclesie consuetudo, & approbata, ut in singulis officiis singulae personae ponantur, quæ ordinanda videris auctoritate nostra disponas. Nullis literis veritati & justitiae præ. &c. Datum ut supra, 11. Idus Maij &c.

XANCTONEN. ET MAG.  
P. Petragoricens. Archidiacon.

**I**nter ea ut supra usque ad verbum sanitati. Insinuantibus siquidem nobis dil. filiis monachis de Brantomio nostro fuit apostolatu declaratum, quod cum Abbati suo domus dominium &c. usque

Epist. 195.  
Ejusdem fecit argumenti.

ad verbum facultatem, excepto quod ubi superius dictum est canonicare, hic dicitur sine fratrum assensu monachare; & cum antiqua sit ipsius Ecclesiae &c. usque in finem ut supra. Nullis literis &c. ut supra. Datum &c. v. i. Kalend. Iunij.

ABBATI ET FRATRIBVS  
Præmonstratensibus.

**V**Sque adeo nos & prædecessores nostros flagrans religionis vestrae fama respergit, ut odore sinceræ opinionis vestrae in Domino delectati, super his quæ à vobis in communi Abbatum vestri ordinis Capitulo statuuntur, nisi vel honori nostro vel justitiæ apertius obviant, nullatenus dubitemus quin ad ea fecundum Deum & statuta vestra rectè ac rationabiliter procedatis. Sanè cum prædecessores nostri Romani Pontifices ordini vestro privilegium indulserint speciale & speciali semper gratia vos fuerint profecti, in his quæ ad correctionem fratrum vestrorum pertinent vos non intendimus aggravare quominus in delinquentes exerceatis liberè canonicam disciplinam. Præsentatæ siquidem nobis fuerunt ex parte vestra binæ literæ, à sede apostolica diversis temporibus impetratæ: in quarum primis bonæ memoriæ Celestinus Papa prædecessor noster sententiam quam in Balduinum & Hugonem ejus socium tuleratis ratam habens & volens inviolabiliter observari, vobis mandabat ut neutrum eorum admitteretis ad consortium vestrum, præter mandatum sedis apostolicæ speciale, nisi forsitan in tantum ad vos in corde contrito & spiritu humiliato accederent, quod eorum postulatio vobis videretur misericorditer admittenda. In aliis verò universitati vestrae mandavit ut memoratum Balduinum, nulla facta mentione de ordinis disciplina, in vestrum consortium admittere nullatenus differretis. Quia verò (sicut vestrae literæ continebant) in ejectione prædictorum B. & H. & fautorum eorum exulavit à vobis scandalum, & pax inter vos & concordia plena regnavit, ne ex receptione talium concordia vestra turbetur, quid de his vel aliis quos secundum statuta vestri ordinis à vestro consortio amovistis, vel duxeritis in posterum amovendos, statuendum fuerit, vestrae discretionis relinquimus; ne per nos rigor vestri ordinis erretur. Ad hæc, vobis auctoritate aposto-

lica indulgemus, ut si pro receptione aliqujus, qui à vobis ejectus fuerit, literas vobis apostolicas duxerimus destinandas, eum nullatenus recipere teneamini, nisi literis nostris expressum fuerit, salva ordinis disciplina. Datum &c. ut supra, v. Idus Maij.

P. ABBATI PRÆMONSTRAT.  
& ejusdem ordinis Abbatibus.

**Q**uæ in favorem religionis ad subtrahendam dissolutionis materiam sunt providè instituta, firma debent & illibata servari, & ne infringi valeant, apostolico præsidio communiti. Significasti siquidem nobis quod communi consilio Abbatum vestri ordinis statuistis quod nullus Abbatum vestrorum mitra vel chirothecis utatur, ne forsan ex ipsis supercilium elationis assumat, aut sibi videatur sublimis, cum his uti se viderit quæ Pontificibus & majoribus Ecclesiarum Prælati à sede apostolica sunt concessa. Nos igitur institutionem ipsam, sicut à vobis providè facta est & recepta, auctoritate apostolica confirmamus, & præsentis scripti pagina communimus; statuentes ut si qua forsan Ecclesia laxioris ordinis vestram voluerit regulam profiteri, hujusmodi pontificalibus, etiam si ea prius habuerit, ulterius non utatur, immo potius humilitatem servet, & in ea statuta vestri ordinis imitetur. Præfenti quoque institutioni adjicimus quod nullus fratrum vestrorum ad apostolicam sedem accedens, vel recedens ab ipsa, vel aliàs, incedat in habitu seculari, nisi evidens hoc necessitas postularit. Inhibemus præterea ne quis contra statuta generalis Capituli, sive in habitu, sive in uniformitate officij, seu etiam in temporalibus, temerè venire præsumat. quod si quis præsumperit, regulariter puniatur. Nec aliquis assumat honorem, ad quem fuerit forsan electus, sine licentia vel præcepto illius cui obedire tenetur, nisi fortè ipse sibi eam malitiosè præsumperit denegare, ut tandem pro licentia obtinenda majori liceat supplicari. Nulli ergo &c. Datum &c. v. Idus Maij.

P. ABBATI PRÆMONSTRAT.  
& ceteris ejusdem ordinis Abbatibus.

**C**Vm à nobis petitur &c. usque ad verbum effectu. Significasti siquidem nobis quod ad implendum illud apostolicum *Ab omni specie mala abstinere*

O ij

Epist. 196.  
Vt disciplina  
monastica ob-  
servetur, &  
quod Pontifex  
cum non velit  
curbare.

Epist. 197.  
Confirmatur  
constitutio,  
quod Præmon-  
stratenses non  
debeant uti in-  
tra & chiro-  
thecis.

Epist. 198.  
Confirmatur  
constitutio  
quod Præmon-  
stratenses con-